

**ՀԱՅ ԱՒԵՏԱՐԱՆԱԿԱՆ ԲԵԹԷԼ ԵԿԵՂԵՑԻԻ
ԿԻՐԱԿՆՕՐԵԱՅ ԴՊՐՈՑԻ ԵՒ ՊԱՏԱՆԻ-ԱՍՊԵՏՆԵՐՈՒ
ՇՐՋԱՆԱԻԱՐՏԻՑ ՀԱՆԴԻՍՈՒԹԻՒՆ**

«Մանր տղաք բերին իրեն. որպէս զի անոնց դպչի, բայց աշակերտները կը յանդիմանէին բերողները: Յիսուս երբ տեսաւ, սրդողելով անոնց ըսաւ. «Թող տուէք այդ մանր տղոցը, որ ինձի գան եւ մի՛ արգիլէք ատոնք, վասն զի Աստուծոյ թագաւորութիւնը այդպիսիներունն է: Ճշմարիտ կ'ըսեմ ձեզի, ով որ Աստուծոյ Թագաւորութիւնը պզտիկ տղու մը պէս չընդունի, բնաւ պիտի չմտնէ անոր մէջ:» (Մարկոս 10:13 -15)

Կիրակնօրեայ Դպրոցը՝ այն սուրբ օճախն է, որ իր հոգեղէն ներկայութեամբ, յաւերժական արժէքներով, հոգեւոր եւ ազգային դաստիարակութեամբ, հայօրէն եւ աստուածաշնչական գիտելիքներով ու կրթութեամբ կը կերտէ մեր ինքնութիւնը, կը սերմանէ մեր մէջ ազգօգուտ եւ եկեղեցանուէր ծառայութեան ոգին:

Այս իմաստով՝ ան ազգային եւ կրօնական դաստիարակութիւն ներշնչելու գործին մէջ ունի մեծ կարեւորութիւն, ինչպէս՝ մաքուր նկարագիր կերտելու, Քրիստոնէական առողջ դաստիարակութեամբ:

Հայ Աւետարանական Բեթել Եկեղեցիի կիրակնօրեայ դպրոցի ուսուցչակազմին ծրագիրով, Կիրակի 9 Յունիս, 2013-ին, տեղի ունեցաւ եկեղեցիիս կիրակնօրեայ դպրոցի եւ Պատանի-ասպետներու շրջանաւարտից հանդիսութիւնը, եկեղեցիիս կիրակնօրեայ քարոզի ընթացքին:



Պաշտամունքը սկսաւ երգեցողութեամբ, սաղմոսի ընթերցանութեամբ ու աղօթքով: Ապա կիրակնօրեայ դպրոցի փոքրիկներ եւ պատանի-ասպետներ՝ ներկայացուցին յատուկ յայտագիր:

Յայտագիրը կ'ընդգրկէր՝ երգչախումբ, տեղեկագիրներու ընթերցում՝ սահիկներու ցուցադրութեամբ եւ վկայութիւններ ու տպաւորութիւններ, որ ստացած են՝ կիրակնօրեայ դպրոցէն ու պատանի-ասպետներու պաշտամունքներու ընթացքին:

Երգեցողութեան ընդմէջէն՝ փոքրիկներ անդրադարձան թէ՛ Տէր Յիսուս ինքն է ճամբան, ճշմարտութիւնը եւ կեանքը (Յովհ. 14:6): Անոնք յիշեցին՝ Տէր Յիսուս Քրիստոսի փրկարար զօրութեան եւ յայտարարեցին Աստուծոյ՝ յաւիտենական սէրն ու հոգածութիւնը հանդէպ մարդկութեան:

Փոքրիկներու յայտագրի ներկայացումէն ետք օրուան պատգամը մատուց Վեր. Յարութիւն Սելիմեան, նիւթ ունենալով՝ «Համբերութեան Ուժը», հիմնուած՝ Յակոբու 5:7-12: Վերապատուելին իր պատգամը սկսաւ ներկաձական մը տալով Յակոբու գիրքին մասին, ընդգծելով, թէ՛ Յակոբու գիրքը ընդհանուր խորհուրդն է «համբերութեան եւ համբերող ըլլալու», ուր հաւատացեալները համբերութեամբ սպասելու եւ ակնկալելու են գալիքը:



Վերապատուելին անդրադարձաւ Յակոբ Առաքեալի 5:7-8,10 համարներուն, թէ ինչպէս կը ներկայացնէ իբրեւ հակակշիռ համբերելու եւ համբերութեան յատուկ նշանակութիւն ունեցող հասկացողութեան: Այլ խօսքով՝ համբերութիւն՝ հաստատ եւ անդրդուելի կերպով կայնիլ, երբ փախուստ տալը հնարաւոր է եւ փափաքելի:

Վեր. Սելիմեան ներկայացուց երեք տեսակի քաջալերական օրինակներ: Ան վեր առաւ Աստուածաշունչէն՝ 1-Երկրագործին համբերութեան օրինակը եւ շեշտեց, թէ՛ անհամբեր մարդը կարող չէ երկրագործ ըլլալ, որովհետեւ ոչ մէկ պտուղ մէկ օրէն կը հասուննայ եւ ոչ մէկ երկրագործ իշխանութիւն ունի բնութեան օրէնքներուն վրայ: Երկրագործին ունենալիք վերաբերմունքը իր աշխատանքին եւ ցանքին հետ ամբողջական համբերութեան իրավիճակ կ'ենթադրէ»:

Երկրորդ Օրինակը մարգարէներուն օրինակն է, որոնք Տերոջը անունով կը խօսին ու կը գործեն: Վերապատուելին նշեց, թէ՛ Տէր Յիսուս լերան քարոզին մէջ դարձեալ անդրադարձաւ մարգարէներուն օրինակին, որոնք կեանքի հալածանքներուն մէջ համբերող եղան: Անոնց համբերութեան պատճառաբանեալ ընթացքը Աստուծոյ կամքին մէջ կենալով կը բնորոշուի:

Երրորդ՝ Յոբին համբերութիւնն է: Ան շեշտեց, թէ՛ դիմադրողականութիւնը արժէք կ'ունենայ երբ փորձութիւն գայ կեանքին մէջ, որովհետեւ կեանքի մէջ չկայ յաղթութիւն առանց պայքարի եւ չկայ բարձրութիւն առանց անդունդի: Եթէ օրինութիւն պիտի ստանանք, պէտք է պատրաստուած ըլլանք ծանրութիւն քաշելու եւ բարի պատերազմը պատերազմելու: Վերապատուելին ըսաւ. «Այս տեսակի համբերութիւնը կը դառնայ նպատակ, յատկապէս երբ կը գործածուի մեր անձերուն շինութեան համար: Յոբ ողորմած եւ բարեպաշտ մարդ էր, բայց ան անցաւ տագնապալից եւ փոթորկալից վիճակներէ»:

Վերապատուելին՝ իբրեւ վերջաբան իր քարոզին, կոչ ուղղեց ներկաներուն, թէ՛ վիշտի եւ տառապանքի ժամանակ համբերող ըլլալու ենք եւ այս ընել այն համոզումով եւ ակնկալութեամբ, թէ՛ Տերոջը գալուստը մօտ է եւ համբերութեան մէջ ուժ տուողը Ան է, որ մարդն ու տիեզերքը Իր կամքին համաձայն ստեղծեց: Հնազանդութեան հրաւերը համբերութեամբ կը սկսի եւ Քրիստոսի անձին մէջ աճելով ու մեծնալով կը շարունակուի:

Յայտագրի ընթացքին ներկայացուեցաւ երկու մեներգներ, կատարողութեամբ՝ Տիկ. Բալիկ Գալէմբերեան-Բօբօվայի եւ դաշնակի ընկերակցութեամբ՝ Տիկ. Շողակաթ Սելիմեանի:



Պաշտամունքի աւարտին տեղի ունեցաւ վկայականներու բաշխում կիրակնօրեայ դպրոցի եւ պատանի-ասպետներու խմբակին, որոնք թիւով տասներմէկ էին: Վերապատուելին շնորհաւորեց շրջանաւարտները, անոնց փոխանցելով աստուածաշունչ մատեան, որմէ ետք մատուց նուիրման աղօթք եւ յորդոր՝ անոնց ճնողներուն:

Կը շնորհաւորենք շրջանաւարտները եւ Աստուծոյ առաջնորդութիւնը կը խնդրենք անոնց կեանքին համար: